

夢

樓

詩

集

夢樓詩集卷二十三

丹徒王文治禹卿

江介沿緣集

自西江歸竊願杜門不出而白下廣陵友朋相招者
不獲辭往來江介忽已逾年得古今體詩九十五首
名江介沿緣集

中秋高明寺坐月呈長老

今夜黃灣月清輝滿寺樓都緣三日雨洗出一天秋光向
雲邊顯涼從樹杪收諸公能會否待我叩堂頭

題曾賓谷都轉西溪漁隱圖二首

西湖西畔路水雲深復深詩人此間過忽發滄浪吟漁竿
三尺玉漁韻七弦琴萬樹梅花外微聞欸乃音

我返西江耀獲展西溪圖竹西歌吹地江東詩酒徒烟波
洗羅綺勲業寄菰蒲他日秋江上回頭憶綠蕪

胡黃海將隨范荆坡漕使南遊都中諸故人以詩
贈行黃海因繪贖詩圖爲題二絕

征衣拂拭出都門又染揚州舊酒痕千里西風黃葉路且
憑詩句與溫存

酌罷離尊更朗吟臨岐始見故人心來春驛使江南路應
折梅花報好音

韓熙載夜宴圖歌爲袁簡齋前輩作

人生不能返情絕嗜窺至道直探性海窮要眇何不縱情
適志爲嬉遊醇酒婦人以終老嬉遊縱乖虛禮法曠蕩猶

是真懷抱若復中慕芬華外深諱強飾空名弋高位可憐
欺已更欺人譬如自械手足求榮貴隨園示我熙載夜宴
圖應是後主潛命閔中之所摹賓從沉酣各顛倒士女雜
沓無檢拘門下翩翩舒雅客後堂盡入同歡娛綺窗對插
紅蓮袖銀屏暗解鴛鴦扣私語忽遭羯鼓驚醉臥仍持錦
袍覆千重步障不知寒萬點明燈如再晝韓公顧此樂不
支還邀翠黛把金卮十年宰相渾閑事百歲光陰爭此時
我聞韓公乞食歌姬院身披衲衣肩袒半多生恐是老頭
陀未消殘惑來償願不然何以胸中浩落無埃塵揮斥黃
金如土賤古來將相誰風流前唐郭令天人儔紫雲尙不
許杜牧紅綃任遣歸千牛霞彩繽紛隨聚散青天亘古常

悠悠君不見隨園叟說士津津時在口座無紅粧不舉酒
夢樓秉戒談空有中夜跣趺同木偶兩人對坐排詩衙從
無片語相疵瑕

李松雲太守招集莫愁湖作歌

李侯守金陵政成逾三年欲與吾民共娛樂乃澹莫愁之
湖城西偏看開黛影山入座鏡磨菱花水納天微風皺縠
春淡淡新月卷箔秋娟娟上有百尺高樓矗雲出紅亭綠
榭相鈎連此湖閱世幾千載六代風流殊未改雕梁一例
燕雙棲烏衣飛去金堂在謾嗟桃李竟無言須信江山真
有待前朝中山異姓王手提刀稍銷櫓槍君臣相悅賭碁
局岑樓高峙湖之秀却與當年金粉蹟共留佳話傳詞場

昨宵李侯招我湖上飲滿壁新詩燦雲錦矧乃嘉賓盡豪

翰胸吐烟嵐成墨瀋

座中張雪鴻袁香亭皆通繪事松雲屬其爲圖

試教圖寫作

屏風畫錄從茲詫神品飲罷諸公聽我歌古今往復如旋
波文章政事固不朽英雄兒女亦復難消磨若非達者觀
物外誰與或嘲或詠任意相婆娑寺鐘鳴街鼓響吾曹歸
後山月朗別有清輝動簾幌

簡齋前輩得黃山柏益蓄之三十年已枯復榮瀋
蓮巢見而圖之爲題一絕

黃山千尺臥龍孫收拾殘鱗入瓦盆卅載枯枝今更茂書
窗侵到綠苔痕

簡齋前輩作園於江甯城北命曰隨園初非有所

因也久之收得前明顧少宰起元贈茂慈詩軸乃
知明時已有隨園亦在城北稽諸邑志所云茂慈
者焦弱侯之長子官曲靖知府殉節者也姚姬傳
有詩余亦繼之

隨園海內競推袁誰識前朝已有園千載自成元亮井一
時漫擬謝公墩春秋花月人同賞忠孝文章道並尊青史
他年徵逸事名山名士耐評論

題陶怡雲深柳讀書堂

五柳舊家世三間新艸堂書聲出深碧溪月破昏黃拂面
人如壁染衣風亦香昨宵曾過訪門外看斜陽

爲吳蘭雪題新田十憶圖

花院奉觴

高堂一尊酒庭院三春暉日暮桃花下裁詩補廣微

草堂尋句

深春閉草堂眠遲愛良夜五字未吟安獨遶梨花下

柘塘春步

桑柘綠雲凝春塘古鑑明塘邊來往熟飛鷺不曾驚

蘇山秋望

紅日暮將落白門人未還茫茫秋色裏何處是蘇山

石溪鷗伴

芙蓉雜楊柳沙際每閑行依依十年事辛苦憶鷗盟

桐屋讀書

夢林言
卷之二
三
秋月欲窺窗高桐半遮屋若非經世書肯向深宵讀

蕉陰茗話

碧草沒朱欄紅薇滴露殘蕉陰貪並坐玉臂恐生寒

烟隴探梅

見梅曾下

拜蘭雪有拜梅圖

探梅豈憚遙遙指梅開處宿烟猶未

消

牛坳吹笛

佳節客中去故山夢裏青何當聽村笛脫帽坐牛亭

稻田聽水

太息思歸客全荒近水田春來溪畔立依約聽潺湲

吳蘭雪感白下舊遊繪秦淮春泛圖寄意係以詩

舊遊回首邈難尋一道秦淮閱古今何待鬢髯如我白人
尚聚散始傷心

坐隱仙菴待王璞山道士不至

龍蟠桂兩株壁立樓百尺忽聞落葉聲疑是人行跡

女弟子駱佩香親製餅餌噉予報謝二首

應笑先生爲口忙絳幃供饌不尋常羹湯一出詩人手餅
餌皆流翰墨香

滿案丹黃散不收忽然洗手辦厨飪啜殘清茗重論古簾
幙斜陽正上鉤

弟子左蘭城以水仙春蘭各一盆餽歲

幾朶水仙偏耐冷數莖蘭蕊未舒妍花開除夜兼元旦消

受清芬過兩年

甲寅正月二十九日郭霽堂招同胡黃海香海暨諸子泛舟至蜀岡探梅先是曾賓谷都轉人日探梅用昌黎人日登高詩韻一時名流畢集屬和甚盛予以後期爲憾仍用韓韻兼以寄會

故人具扁舟招我同吟弄澄渚波漾雪雪霽梅破凍此地何郎才久爲詩料用南豐持使節復此攜賓從勝賞昔賢同高懷吾輩共茲來躡後塵座上餘香送因憶蘇子瞻築隄探湖詩至今歌樂利讌遊詎云縱春光雖迅駛人事無空憊惜花約再來多情古所重

次日都轉復招東園看梅再用前韻

纔製催花吟已奏落花弄所以惜花人尋花常忍凍三春
若無花詩酒成何用花中若無梅紅紫但與從使君領羣
芳偏招隱淪共東園花最繁清影當筵送自慙衰朽年才
盡如枯葑尙餘浩蕩懷對花聊一縱須知光景移萬古俱
空億勝賞惟目前一刻千金重

曾文香墅於所讀經史子集凡有所見輒筆記之

題曰香墅漫鈔頃承見示因題後一章仍用前韻
詞華鬪繁豔風月徒嘲弄注疏泥篇章未免蠅癡凍讀書
貴心得隻字歸實用旦暮遇此人吾願執鞭從先生負異
才才復與學共古今淆訛案盡向靈臺送冥搜擷菁英博
採兼菲葑富有人或能深醇天寶縱顧我貧廢學暮景逼

空德無緣同討論作詩聊引重

曾賓谷題玳梁畫扇次韻奉謝二首

閨中惟合祀鍼神誰遣烘皴仿昔人半幅蠻牋課孫女貧
家樂事在天倫

都運詩才妙入神頓教幼女作傳人千秋畫史畱佳句只
道丹青果絕倫

附錄原倡

阿翁詞翰兩如神祇有丹青讓古人補得右丞家法在
女孫畫筆又無倫

上巳日與弟子高青士左蘭城由臨東亭至淩江
閣時辛夷將落碧桃盛開感而有作

臨東亭外春江深，
凌江閣前春靄陰。
白首欣逢上巳節，
青山真對故人心。
偶聞時鳥語，
相答不覺飛花香。
上襟辛夷開過碧，
桃綻眼底榮枯卽古今。

女弟子駱佩香茅山禮真未歸，
連日風雨特甚，作詩寄之。

萬樹桃花半落英，
濃春能得幾天晴。
年衰難挽韶陽住，
詩好偏宜勝地行。
五兩烟凝雙板重，
三峰翠拂六銖輕。
靈旗風雨茅君廟，
舊侶乘鸞定遠迎。

張舸齋新構小軒，
卉樹叢密可喜。
春雨初晴，乘興訪之，未值，留題於壁。

春深張廡剪蓬蒿，
雨後仍餘竹外桃。
三徑想因求仲闕，
孤

節特爲戴公勞，飛紅畱客時。
縈几浮白期，君共染毫簷樹。
日斜梁燕返，畫廊猶自遶周遭。

麗春臺春望

鶯花經雨已將休，忽爾逢晴展勝遊。
新綠遮城春似海，斜紅渡水日沈樓。
夢中往事憑誰弔，天外行雲不我畱。
莫怪臨風貪佇立，恐輸生計與閒鷗。

汪春亭聽泉圖

泉靜如人靜，泉流似玉流。
數聲松嶺外，一泐深澗秋。
遲我抱琴至，從君策杖遊。
前溪明月上，天水共悠悠。

胡黃海歸自吳門，維舟相訪邀同郭。
霽堂舍人登臨江閣承黃海次予上巳詩韻見贈奉答一章兼

寄范荆坡黃門

惜春惜別總情深霽色連朝洗積陰吳苑鶯花新人夢揚
州朋好舊關心河橋忽遇南來棹江閣重披北望襟轉眼
燕臺持節去也應回首憶而今

湘花詩和吳蘭雪二首

并序

周氏女家於蘇年十九歸山東詩人劉松嵐姿性
閑麗吳蘭雪字之曰湘花潘榕臯農部爲畫蘭以
代寫照蘭雪復賦長篇邀同人屬和予更命女孫
玳梁寫蘭以和榕臯而綴詩於尾以和蘭雪和詩
僅二絕句殊不稱蘭雪之長篇亦各舉胸情而已
衰年無福賞湘花紙上幽姿亦足誇爲命女孫重寫照國

香分影上窗紗

遊盡江南春暮天
劉郎風韻勝前賢
河陽空有花千樹
不種幽蘭亦枉然

夏至前二日農人望雨甚殷適汪倣齋以潘蓮巢
喜雨亭畫扇見示展閱之際驟得甘霖率題長句

紀之

化育冥冥歸太空
長養萬類誰之功
畫家獨能師造物
頃刻原野青濛濛
東坡偶成喜雨記
蓮巢妙手傳其意
不勞迢遞寫扶風
眼前景色江南是
江南入夏方憂旱
披圖忽覺陰雲滿
須臾驟雨竟翻盆
畫識人人詫奇誕
見說蓮巢染翰時
郊原膏雨正芳滋
心靈適與天公合
意匠還應草

木知鳴呼蓮巢儀容難再覩此畫流傳定千古閒齋無事
莫開看只恐檐前走風雨

曾都轉招門人蒲快亭下榻董公樓快亭呈詩都
轉次韻答之同人多屬和者余亦有是作和快亭
兼柬都轉也

東南佳士盡從遊官舍偏如茅舍幽愛客盛傳徐孺榻辭
家莫擬仲宣樓花階顧曲堪停月梧院裁詩欲借秋難得
荊州生並世豈惟君不羨通侯

題唐六如寫戴安道破琴圖

太白風流污永王六如寧邸獨高翔破琴聊寫平生志流
水高山韻更長

門人鄭新甫問字於都轉蒲快亭再用前韻爲贈

因倣義山體謔之新甫快亭同年友也

見說龍門未易遊同年同探西山幽欣逢舊雨開詩社無

那春風閉畫樓

快亭春日有遣姬事至今不無惆悵

桃觀難尋前度夢桂宮

將到昔年秋

今歲開科

不知身在蒹葭列苦慕連珠比夏侯

蒲詩

引夏侯湛連璧事蒲鬚髯如戟殊不稱也

賓谷都轉以詩見酌報謝一章三用前韻

平生曾作海天遊近日惟耽一壑幽庇我萬間寒土屋

時都

轉館子春風園

登君百尺會仙樓墨磨玉局人空老學到家承歲

始秋惟楚儲材吾豈敢明珠只合屬隨侯

繡詩樓歌爲吳蘭雪作

蘭雪容吳門爲劉松嵐明府姬人周氏賦湘花詞
周德之甚爰繡其與蕙風夫人石溪看花唱和詩
以爲報蘭雪將爲樓以供之子爲之歌

彩鸞夫婦詩如繡瑤瑛拈繡腕有詩十二瓊樓霞萬片化
爲人間五色絲兩首新詩八十字鳳凰和鳴曉鶯膩當時
挽手石溪行花光十里春烟織才子從來多旅愁青春還
作吳門遊飄零月下吹簫市冷落雲中寫韻樓劉郎重友
逾趙璧藍橋特出傾城客心感多情黃絹詞鍼神摹就簪
花格不繡西方兩足尊亦復不繡平原君以詩爲繡心良
苦以繡耐詩古未聞一幅瑤光錦繡段蠅頭排列明珠貫
弗惜春纖挑刺勞轉愁落紙雲烟散蒲帆早晚溯江歸對

展還應向繡闈想到雲鬢繡衣濕繡詩樓上倚清輝

六月廿有一日湖上泛舟觀荷時女弟子駱佩香
與內子達有暨女孫玳梁亦有斯遊駱卽席成詩
同人皆次其韻

紅衣含露漾文漣翠蓋擎風反更翻畫稿詩篇分列陣笛
牀硯匣其移船人間到處堪行樂我輩誰云不是仙明日
屏風圖恐遍未須迢遞待千年

佩香舟泊高詠樓復成一詩再和之

花從歌吹繁時密水向樓臺斷處空恰好舟移斜照裏願
教身在衆香中聲名海內常相望詩酒天涯此暫同今夜
清光升較晚莫辭羅袂久臨風

白蓮同佩香作

橈穿紅略約纜繫青琅玕水亭人散盡篷扉獨倚看墮波
隨影化待月耐更闌卻因螢火出照見玉姿寒

七夕大雨同賓谷和郭厚菴

咫尺銀濤似海寬夜來風雨太無端惟貪河伯雲車疾不
惜天孫玉珮寒人世驚波原夢幻仙家良會亦艱難道人
近日心情懶兒女繡絲不耐看

銀河洗筆圖

門人左蘭城夢洗筆於銀河唐耀卿作圖予爲之

歌

銀河倒流瀉碧空奔騰直下東海東中間千里萬里始一

曲奇詭儻忽無終寤人世之奇猶可見當其在天已千變
雲霞滅沒千百億由旬下界望之纔一綫左生弱冠才翩
翩吟詩不鬪章句妍披露天真謝雕飾澄江匹練同新鮮
綵筆疑從夢中得夢中徑到銀河側此河慣濯天孫雲錦
裳不假繡紋成五色初夢鮫宮寶燄騰靈鳥導汝徐上昇
旋成鱗比萬樓閣綺窗雕檻開層層忽然樓閣皆不見但
見銀河浩蕩傾汝之胸膺朗朗千尋湛如玉蒼蒼一氣寒
如水爾時汝立縹緲之高峰四顧一碧無人踪探懷忽出
三寸管一洗毫端萬古之塵封覺來靈境成惘恍此身猶
似重霄上便求好手繪爲圖星漢微茫示諸掌慧業從來
有夙因夢中之事寧非真試向海濤迎此筆應有黃姑阿

母助汝之精神我欲倒騎赤龍尾御風橫過九萬里不論
京房伏勝之遺經以逮柱下蘭臺之信史盡取當時點朱
蘸墨之毛錐投入洪濤重滌洗此事恐非汝所知待汝一
口吸盡銀河水

汪心農繪試硯齋爲圖再索題詩六首

曉起微陽照綠苔蕉心如紙卷初開呼童好汲清泉水自
向明窗試硯來

割取鮫宮紫玉精青華火捺暗還明最難雒鵲星眸朗涵
得秋光萬里清

好古如君世所稀臨池終日闔雙扉晴齋一展千金帖時
有墨香來襲衣

一緘千里寄衡廬

身未識心農時會從休寧馳簡遠索余書

儵已論交十載餘

猶記黃鸝坊畔住

子客吳時假館鸝坊橋之樂一載有餘

會將此硯

索余書

無端小別欲三年開卷相逢忽眼前何日攜君齋裏硯爲君潑墨向秋天

簪花妙格古來聞黛色脂痕別樣春更囑君家多蓄硯

中還有學書人

心農有碧珠意珠二姬人皆工書

鄭三雲以自題雪夜校書圖詩見示次韻答之

雪光照破夜牕昏窗外梅花若有魂萬卷讀殘誰與會燈前惟共美人論

肯將官職換詩名冷淡豪華只自明多恐吟情兼雪意化

爲仙子下瑤京

爲楊東川孝廉題畫

小樓初雨夢初醒
獨理殘書傍畫屏
溪童報道杏花發
折取一枝供膽瓶

師樸園觀察長江攬勝圖二首

官聲真似大江清
解組仍思自濯纓
浩蕩秋光流不盡
青天皓月識生平

千尋太華峰如掌

樸園關中人

萬里長江玉化虹
宇內山川最

奇處被公都卷向胸中

種菊爲家可泉作

吾宗愛種菊
小築江之濱
所居雖近市
所事實遠塵
始春

逮仲秋爲花長苦辛東風灑膏雨土潤先分根穀雨葉繁
茂芴枝去其紛自此日培養灌溉常凌晨肥恐長蝨賊瘦
慮傷精神務教燥濕調還望雨澤勻尤重在脚葉舞女迴
仙鬟初種如立苗畦吟排魚鱗繼乃配五色嘉種移磁盆
猶記花開時置酒延衆賓華燈珠錯落怪石峰嶙峋臺榭
高復下松篁聚還分惟花間其中藻采何紛紛或如脣綠
玉或如琢紫珉或翔鶴翎黃或卷鸞尾銀或曳朝衣舊或
點絳唇新集紈而鬪錦飛霞以雜雲濃如朝陽吐淡如斜
月昏千態難強名百變能具陳我時攜家姬列坐依苔茵
上方命紙筆下方和笙斲清商一以發爽氣昇高曷白日
不忍暮青天疑再春作詩寄來者此會逾古人

攜弟子劉春橋與左蘭城訪張舸齋於飲綠山堂

遂同登西津閣

雲間有客繫歸航

劉松江人

同訪詩人飲綠堂已向幽窗沾竹

翠更凭高閣挹江光
新秋旅鴈斜陽外
舊雨閑鷗古渡傍
老我吟懷無處着
祇應回首少年場

重陽前三日借張舸齋左蘭城預作登高之會時
蘭城將遊吳下兼以贈行

秋來每是愛登臨
節近重陽更賞心
踏遍青山仍選杖
看殘紅日復披襟
烟鐘徐出南朝寺
霜月將催午夜砧
明日吳趨雖小別
風前離緒也難任

艾衲亭茶話

重陽風雨後喜見暮天青石臥木犀院苔深艾納亭烹茶
候秋月話舊感晨星陋室堪千古吾將更署銘

秋日新晴登北固山

晴日殊堪愛秋天似更高沙平開海色山迥壓江濤日月
雙丸疾興亾一局勞孫劉何限事莽莽付蓬蒿

秋日憩戴公園故址同張舸齋左瑤圃郭蘭池

晉代園林址尚存西風爲掃綠苔痕紅芙蓉菊向人艷野
水孤雲不自溫無數青山歷城堞幾家白日冷柴門年來
愛傍荒寒處此意須同知者論

雜咏七首

玉塘荷葉正田田喜見荷珠玳瑁圓萬顆光明穿不得一

齊瀉向水中天

鶯聲昨夜報春殘
滿院梨花尙作寒
簾下美人慵乍起
烏雲不理便凭闌

十里苔痕嫩綠鋪
一池秋水淨如無
此中空洞容何物
取請天作畫圖

夏始春餘景物佳
園中花事密如排
無端一陣黃梅雨
剩有殘紅落滿階

秋鴈飛飛傍水隈
沙明苔暗暫徘徊
機心一動便高舉
縱有稻梁招不來

綠陰池上晚垂釣
黃葉山中秋會琴
忽有客來求作字
旋研古墨仿來禽

孫壻汪詣成自揚州饋菊詩以謝之

今年十月菊初開遠致蕭蕭水竹隈人帶朝曦負鋤出秋
隨寒鴈過江來幾番冒雨巾空墊此夕臨風首重迴羨汝
高堂多道氣

尊甫梅村
銳意向道

延齡好進掌中盃

效韋蘇州體寄懷曾賓谷二首

炎曦方握手倏忽秋已暮綠陰變黃葉丹楓替紅樹眷言
素心交翹首白雲渡令名欽自昔燕好新成故端居思往
事幻化速如鶩結契關神明語言非可喻滔滔江水深臨
風一馳溯

自予臥菰蘆門希冠蓋轍良由知音難匪關慕高潔人生
秉微尚貧賤難磨滅若無鍼芥投焉能膠漆結都運本熱

官門前盛干謁場來轉清寒
衙齋餐白雪惟我崎嶇人幽
芳共相擷謂當常因依誰念
成久別涼秋落葉聲清夜墮
窗穴還將一寸心耿耿寄明月

再至餐英閣看菊二首

黃花又過一年秋依舊西山
入畫樓儘把清閑酌晚節誰
知冷淡是風流

佳種從來開較遲士當晚遇
遇尤奇天公無限憐才意畱
在秋光欲盡時

暮秋佩香歸自吳門得陸謹庭汪心農書以詩代
答二首

塵事匆匆劇可憐吳門烟月
忽三年柳邊柔艣金波蹙花

外清簫玉漏延悵望浮雲隔鶯友殷勤舊雨託鸞牋東風

黃土憑誰問

來書有當時座間絕代之人
一嫁東風一歸黃土之語

剩有平生翰墨

緣

老來生計付漁竿烟水何人欸藥欄雲臥都忘江海濶夜
吟欲逼斗牛寒百年素侶無多在九日黃花已半殘遙想
八行傳到後小樓剪燭共開看

袁簡齋前輩八十生辰四首

人間真見地行仙魯殿巍巍八十年放出詞華凌斗岳收

歸經濟付林泉菟裘卽憩甘棠舍

公官江寧愛小倉山之勝遂家焉

海屋

兼開合巹筵

令郎卽於公生日完姻

謾說盛名能損福才高造物也

無權

少小蓬萊頂上行忽來江左課農耕
三春花柳供吟料四海風騷仗主盟
官愛早休尤望重子緣晚得轉身輕
最難德曜同康健常使賓筵斗酒盈

落拓當年泛海還先生顧我獨開顏

先生最賞予海外詩錦書薦士

風塵裏綵筆論文天地間共信愛才如性命由來得助有

江山向禽五岳遊俱遍更借西湖一掩關

先生每年因掃墓得小住西湖

異數須教待異人爲公別啓一家春
夔龍未具烟霞骨屈

宋還兼壽考身花國又開燈世界

隨園每歲爲張燈之會今年當更盛矣瓊

筵共仰玉精神朝鮮見說輿金至密購新詩遣重臣

雪後初晴同左瑤圃及令子蘭城登西津閣遠眺

雪積大江暗雲開衆嶺明凌風啓高閣寒翠撲簷楹歸鳥

壓林重斜帆閃日輕衰遲逢快友應似晚來晴

雪屋

手結茆爲屋偏教雪裏藏全封漁父笠半沒定僧床踰伏
寒潭外欹斜凍樹旁此中高臥者吾欲一壺將

寒月

禪榻三更後鬚眉凍欲凝穿窗何處雪鋪院一方冰絕寒
橫千里危樓上幾層廣寒疑太近高處喚能磨

釀雪

岸容山意費推尋薄霧濃烟混淺深幾日弄寒非爲雨長
空如暮不成陰六花暗孕天孫錦孤影難傳月妙心預選
杖藜招冷客深梅早晚上雲岑

雪海

海濤原似雪漫漫鋪雪誰知似海寬
屢吐樓臺銀作棟
槎浮霄漢玉生瀾
中天接水還兼月
萬里無花祇有寒
轉惜當年隨博望
瓊田未向斗牛看

琉球國爲女牛分野子會隨冊使至其地冬暖無雪

嘉平望後二日同謝薌泉漕使朱白泉觀察暨門人魯選堂焦山待月次謝韻

海國迢迢夜清寒不可支
登樓澗酌酒掃石坐論詩
月起潮先報風迴樹已知
尙邀高士賞終惜素娥癡

遊焦山同謝薌泉漕使有懷曾寶谷都轉卽次寶谷擬遊焦山不果詩韻

塔鈴不報江風顛
金焦兩點如浮烟
晨曦策馬向官渡
謝

公今遂尋山緣先是都運有成約三日便放南來船兩家
賓客盛文采各闢險韻敲詩篇山靈拱手已相待一鞭翻
讓祖逖先兩公矯矯人中仙玉堂幾載舊往還傳言海國
成邂逅頗疑文星降自天江干老叟臥寒雪春蠶瑟縮性
所便聞茲盛舉似爬疥隔宿預將芒屨纏奚童擔酒頰雙
肩齋廚急向江樓遷白泉不速轉能至

朱觀察間遊不速而至

南豐

臨流卻復旋智者難知來日事我輩且參不定禪

台宗有頓漸祕

密不定

江山清空竹樹秀人生外此何求焉夜深潮上月亦

上浩蕩萬頃開瓊田懷人北望但平楚臨風醜酒雙峰巔

晨起艾納亭看雪

雪薄晴易釋急就鄰家看微紅射林杪淺白留簷端怪石

仆仍立古亭空更寒主人具盞粥邀我共晨餐

家菊莊孝廉以詩見投次韻奉答卽題其倚樹聽泉畫幀四首

江南到處有名山老占林泉命未慳
隔歲籃輿記相訪草堂如在白雲間

百歲光陰疾似馳夕陽卻是最佳時
桑榆宵享清齋福花下期君飽豆糜

一枝斑管且醫貧也似昌黎諛墓文
了年來詩作書白活來詩及之萬顆明珠休用攪流泉自在與君分

佳樹陰繁不蔽空香亭妙筆洗塵蒙
圖爲袁香亭所作琤琮聽到

無聲處泉自西流月自東

夢樓詩集卷二十四

丹徒王文治禹卿

乙卯集

余作詩頗自矜重選輯亦嚴初未有一年得一卷者頃行年六十有六矣歲終自訂所作居然成卷因以乙卯名之蓋良友迫逼之益居多亦私幸老而猶健也古今體詩九十二首

乙卯正月四日午後偕門人左蘭城郭厚菴蘭池叔姪北郭閒步晚憩寶蓮菴之無餘閣見新月有
作

老懷待抒寫苦乏童時交偶偕問字起步屨過江郊草木盡僵凍枯枝橫瘦蛟梅蕊久欲放寒凝難拆苞微春何處

尋似寄垂柳梢造物當斯時密意工推敲華滋暫瑟縮元
氣深含包不待暖風迴艷陽已孕胞晚復見新月一彎露
山坳甫看玉鈎挂尙未銀丸拋清光縱十分哉生卜初爻
我輩遇此景匪徒助弄嘲蘊真良在茲言詮恐易淆

袁又愷欲表其母韓太安人之節繪竹柏樓居圖
乞海內名流題識頃又乞余女弟子駱佩香暨女
孫玳梁合寫竹柏於卷余系以詩

合作倪黃舊擅名今從閨閣見雙清染毫寫出水霜骨錯
認承天月影橫

上元立春

餘寒直送到新年半月嚴霜凍更堅童稚喧傳春色倍老

夫默感歲華遷試燈風裏催冰解餞臘盃中見月圓明日
水村山郭路垂楊枝上有輕烟

人日同曾賓谷遊焦山次韻六首

老來身不繫萬事盡雲烟離合原由命登臨亦任天名山
因客顯佳句似波圓此日扁舟興林宗未是仙

無心耐宿諾

公有約未果
今無意得之

有幸遇佳辰熙皞人爲日微茫

海借春盤空蒼鶻健狎浪白鷗馴古洞題三詔能無羨隱
人

萬里接江光蝸廬一曲藏深探多礪谷遙望但青蒼鼎蝕
仍傳籀碑殘誤認王使君稱博物著論莫辭詳

僧廊多古蹟次第檢尋來捫壁身梯石披榛手剔苔梅心

如索笑篁韻似流哀幽討兼幽賞禪關信絕埃

極頂瞰松寥鐘聲又送潮牕中三島近世外兩丸跳忽值

鸞停馭

時女弟子佩香探
梅山中不期而遇

逾知地遠囂諸天應可接花雨

暮飄蕭

送君蟾乍吐畱我夜尤清

是晚公即登程
予止宿山中

山壓洪濤重天

浮大地輕帆稀將到海漏靜爲離城倘此常棲息神丹定

可成

次韻酬謝薊泉漕使見贈

謾道文章繫職司百川東下得公支子旌肯賣求羊徑大
筆惟塗李杜詩秋府丰裁瞻豸觸春江冷暖合魚知道人
老去風華盡只剩吟情一分癡

春日再至艾衲亭看雪

艾衲亭前竹樹多，雪晴素影更婆娑。
主人布被蒙頭臥，莫報先生杖履過。

平山探梅寄寶谷二首

春風特地渡江來，爲訪平山萬樹梅。
昨日扁舟閒載酒，繁枝已向水邊開。

東園玉蕊怯寒飈，春嶺全敷冰雪姿。
不是山人親採取，憑誰細報使君知。

爲阿雨窗題越游詩意圖冊

越東山水窟到處，足淹畱我昔扁舟。
過無緣載酒遊，詩清原有畫春淡。
更宜秋偶爾，因行部偏能狎海鷗。

賓谷都轉招同袁簡齋前輩張警堂同年謝蕪泉
漕使清燕堂觀劇歸途大雪有作

自古文章號有神一時賓主盡才人已酌東野雲龍願況
有南皮絲管陳雪與梅花麈白戰燈連酒海照紅春夜深
扶醉羣仙散萬道瑤光引路塵

題吳玉松翰林除夕遊山圖

老來疎世事除夕每多閑守歲常枯坐尋梅或啓關羨君
鷗鳥性挈伴虎邱山惜未將茶具扁舟共往還

伊小尹守揚州招予平山雪後看梅口占一絕贈
之

春城雪後見橫斜同泛仙舟向暮霞不識平山賢太守還

應比雪比梅花

題沈小霞畫梅

小霞名襄前明錦衣衛經歷會稽沈鍊之子疏幼
嚴嵩廷杖謫田保安州尋爲嵩所陷戮于邊鍊謫
譴時逮襄甚急遁一年伯家匿身地窖中日畫地
爲梅三年而畫工世稱小霞梅後疏白父寃隆慶
初鍊贈光祿少卿謚忠愍襄子蔭官至黃州守歸
隱越中云

複壁臺卿匿跡深悶來畫地寫胸襟我今欲改先賢句數
點梅花忠孝心

張松園方伯蕉陰默坐圖

文石千年古蕉陰一丈長于焉此棲息偶爾忘巖廊政淡
三春兩心生六月涼從來經世業妙寄水雲鄉

邗江雅集戲紀絕句五首同隨園前輩作

烏府先生清似水

謂蕪泉
漕使

毫端霞影吐千層南來忽遇隨

園叟百棹觥船興共乘

隨園白髮領風騷曲對知音調更高太傅門庭真廣大傳
經直到鄭櫻桃

樂府須畱大雅音深卮飲罷且停斟可知叔夜多情處不

賦箏瑟只賦琴

計郎色藝獨冠揚州舊名
賦亭今諸公爲易賦琴

庾杲王恭各擅場互教桃李植門牆揚州烟月花千樹也

要宗工玉尺量

管領羣芳未是夸才名海內更誰加急須傳與東君檄認
取春風第一花

真州酬德臥雲司馬二首

偶挂輕帆向白沙臥雲仙吏正休衙夜燒紅燭同聯句曉
汲清泉共煮茶野老亦知曾憩樹名園邀賞未殘花紅蓮
幕下多吟伴話到詩禪總一家

謂張碧川孫
秋水諸子

自說長安值異人至今丹鼎火猶溫金華發蕊陽神王

去聲

玉水生肥夜氣存五世勲名昭國史

司馬開
氏裔頃作紀家世

國董鄂

詩屬子三千功行紀天門他年若遂青霞願一卷察同更

書之
細論

送別謝薌泉漕使

玉梅含雪君尋我紅藥翻階我送君氣吸百川傾美酒神
超千古賞奇文離懷直溯河流上秀骨新從秦岳分登嶺泉
詩蒼奇似杜祇恐紫微天上去頻勞回首暮江雲

遊俞氏園同碧川秋水諸子

花事已將盡看花人始過到門芳草遠鋪地落英多新漲
通紅約遙山入碧螺閒鷗饒野性今日近滄波

真州吳東也齋中賞牡丹

牡丹天氣晝沉沉樓閣參差院落深客意不妨隨去住花
情最喜半晴陰滴紅真飲仙人露倚翠纔知道者心入夜
燈光明似錦簷前新綠倍森森

畱別尤水邨布衣

鶴飢不依人，蟬清惟飲露。鷗沒肯隨波，鴻冥那知處。尤君
荒江濱，孤介天所賦。性本遺世榮，非關士不遇。少年負奇
氣，遠走長安路。賢王折節迎，公卿枉車顧。聲名詎不華，終
然舍之去。邇來臥僧房，鬢髮颯已素。釣竹每親栽，茶經還
自註。聞名三十春，相逢惜遲暮。冰雪君懷空，烟霞余疾痼。
明日別君行，臨江不忍渡。

牡丹二首和賓谷韻

展將彩筆賦名花，親向三霄染露華。夏淺春深真勝日，雲
廊霧箔是仙家。醉來扶倩唐宮婢，貴後驚看越國娃。轉恐
飛瓊天上過，却停鸞馭賞紅霞。

楊柳樓心月轉時，空中猶聽紫簫吹。千秋早冠羣芳譜，今

日方邀絕妙詞行雨襄王雲作夢傷春杜牧鬢成絲此身
願化青青葉長護熏爐一夕期

謝薌泉乞尤水邨袁竹室錢玉魚合寫梅竹石於
扇以寄佩香佩香屬余題詩

一片寒山石相依道蘊家竹癯知有節梅冷欲無花憶昨
三賢聚臨風點筆斜感余懷友意搔首向天涯

三月二十九日賓谷都轉邀同張警堂家少林胡
香海樂蓮裳篠園看芍藥卽和原韻

一年三百有六十只有春秋得佳日春光較秋去似疾揚
州春盡紅藥開如雲如錦紛驚猜傾國士女傾金鬢
春不識春歸處白頭仍欲依春住春光欣得使君護名園高

燒萬銀燭浩態狂香塵輾麴天上人間春始足千載春爭
此一時對花酌酒花應知繡花還買五色絲

爲朱敬亭題荔鄉圖二首荔鄉敬亭姬人小字也
過了江南芍藥天八閩佳菓正芳妍紅羅似霧籠肌玉海
月光中第一仙

少年遠駕海東航曾繫蘭橈傍荔鄉淺碧輕紅都忘卻重
將風味問仙郎

三朶花

揚州篠園芍藥有一朶三萼者余戲以三朶花名
之賓谷爲賦三朶花詞甚工余弗能繼作以律體
塞其請

揚州舊說二分月湖上今開三朶花金帶玉盂空往跡同
心並蒂遜風華雙巢夙世仙人樹一宿何年行者家會取
淨名門不二大千紅雨滿袈裟

咏鶴四首爲汪十庚作

飼鶴

鳳飢不覓人間食鶴飢更奮冲天翮花田百畝盡瓊瑤欲
儲鶴糧不易得鶴瘦渾如常抱飢鶴肥毛羽安能奇知君
與鶴周旋久鶴之性情君自知

浴鶴

濃陰十里夏日長溪澄如鏡瞻天光忽來鶴向波間浴人
心鶴骨同清涼鶴非假浴天然白無垢由來浴也得浴罷

翻飛卻上天一雙界破朱霞色

調鶴

誰言鶴性不可馴神仙控之朝上真誰言鶴性頗易養飲啄不隨人俯仰君之調鶴如調心不緩不極隨淺深調到心花開放處蹁躚雙舞玉堦陰

放鶴

一鶴直上千青旻一鶴欲飛猶戀羣少選俱飛逼霄漢鶴聲一一天外聞萬松複杳森成列松邊石徑仙凡別鶴歸還向松頂棲疑是高柯未消雪

爲家少林追題其曾祖樓村先生十三本梅花書
屋圖卽用卷中查他山韻

才人胸次無不奇，卽於所夢略見之。萬本梅中十三本，譬諸瑤林取一枝。覺來幽香猶滿室，仙葩難從夢裏移。禹君提筆貌古姿，

圖爲禹鴻臚之鼎所繪

查子伸紙題新詞。眼前廣廈未

及構，且以畫餅充餽飢。當時才望重，玉墀百年瞬息風。吹此圖流落江海濱，屠沽販豎徒喧卑。賴有曾孫繩祖武，詩才吏事靡不宜。收將手澤歸故處，亦是仁孝之所爲。憶予訂交君甫冠，今日相遇俱衰遲。花前握手道往事，恍似塵劫更僧祇。更出此圖囑我賦，知君篤意憐故知。種梅補屋良可期，問君千秋還付誰。詩成署名殿卷末，我情誓爲梅花癡。

陳同年東浦方伯屢過快雨堂賦此致謝三首

卅年臥滄江親故阻榛莽霓裳同詠人亦復隔霄壤維公
如巨海細流歸滢泱道高志愈下量深納彌廣梅雨歇空
庭柴門馬蹄響三日兩過存僕御識先往杯水飲亦甘穿
席坐偏爽非關崇貌敬實乃荷心賞餘年故人聚愜情勝
爬癢

公年政七十矍鑠邁廉頗讀書真有得六鑿皆天和歐陽
富文學人或稱洪河一口吸西江於公未覺多自公涖南
國倏將十載過政從肫懇發才藉盤根磨羣星拱秋月萬
木依蒼柯旬宣有餘暇古意成詩歌願公長壽考愷澤流
滂沱此言非余私四野香盆羅

建業多名園規制盡閑雅瞻園方岳署竹石秀而野相傳

中山第舊稱萬間，屢維公居其中，獨樂擬司馬自奉，但脫粟留賓，必玉學真意之所流，毫髮焉能假憶。昨白門遊，相邀珠釀，瀉子才今才子，姬傳古儒者，二客各千秋，相殊復相下，樂奏羽諧宮，歲成冬佐夏，先生皆領之，精金入大冶。此事忽三年，良會去如捨，前宵清話久，熒熒一燈燃，俯仰去來，今天懷得傾灑。

得畢秋帆總制書寄懷二首，時有平苗之役，駐節

辰州

莽莽蠻天春欲殘，伏波當日此登壇，儒臣韜略皆書史，聖世兵戈卽羽干，虎伏箐林千嶂險，鳶飛毒霧五溪寒，有苗深廩，重華慮三捷，紅旗早晚看。

前年送我返漁汀，每向雲霄憶典型。報國孤忱惟捧日，籌邊雙鬢恐添星。文章交契千秋在，鐘鼎功名百戰經。聞道年來多內養，夜深鈴閣誦黃庭。

獨立

秋深黃葉盡飄零，疎樹分明露遠汀。獨立寒原何所事，欲將眼界看青冥。

秋谿詩思圖爲陳秋崖作秋崖東浦同年之子也。家聲清似水，詩意淡如秋。橋接夕陽渡，谿通黃葉流。耽書嘗避客，得句勝封侯。欲遂名山願，圖中且臥遊。

題陶雲湖叢篁水鳥圖卷

幽篁低地碧成叢，水鳥閒眠淺草中。忽憶錢塘江上過，停

舟野寺賞秋空

張舸齋以其先人寄兄手札見示讀之使人增友

于之重題一絕

雲中飛鴈掠寒汀影過秋江不肯停今日山堂題句處可知春草爲誰青

送奇麗川中丞還都次簡齋前輩韻二首

半闕驪歌酒未乾一鞭遙指五雲端化成海國波皆暖去後吳民枕尚安舊雨停橈揮別淚謂簡齋新秧含露拂征鞍歸裝絕少江南物惟有松肪助晚餐

殷勤古硯贈紅絲勗我龍蛇腕下奇中丞贈予古硯誌別銀管舊題

三省壁甘棠仍傍萬年枝禁城秋淺還朝日江水春迴

再到時清闕倘過高士閣

謂趙球亭先生

爲言滄海有相知

樂蓮裳蓮隱圖

池邊楊柳綠烟濃池裏蓮花紅霧封權入蓮花深似海憑君何處覓行踪

得顧雲臣弄璋圖戲爲賓谷壽且祝其得子也

去年此夕詠紅蕖四座佳篇盡起予甚欲重爲腰笛客且教戲寫弄麀書久聞阿氏藏金屋

用米帖語

預卜佳兒步玉除

他日集英呼第一莫忘顛米賦詩初

題佩香畫蘭仍用賓谷贈玳梁韻

春風春露爲傳神空谷無人若有人莫道閩中無屈宋試圖香草也超倫

懷祝芷塘二首

同向江湖作寓公依然蹤跡各西東
名山臥病春風裏往事閑思秋雨中
青瑣陳言由感激白頭旅食歎蒙戎
何當共剪吳淞水盡把生涯付釣筒

當年相勸學無生謾笑黃金未可成
假我千秋仍寂寞誤人兩字只聰明
月沈海底何由拾珠在衣中孰與爭
君不迴頭吾自喚老來惟此是多情

次駱佩香四十感懷韻卽以爲贈

清如松頂月明若荷盤露鮮葩得雲泣
澄波與風過此自關性靈常人難學步
斯文千古業巾幗罕能與那知繡閣
中居然有儒素老夫隱荒江迂拙實天賦
羣書祇遮眼不

耐摘章句誰復從。菰蘆拭目問子布。颯然五雲際。罡風珮
聲度。求我披瑤函。指點虛無路。平生文字癖。至此忽發痼。
傾囊洩幽秘。不畏造物妒。伊昔楚靈均。自佩明月璐。弟子
雖唐景。如寐纔半寤。君身一女。郎深窮風雅。趣轟闖陷文。
陣森嚴。排武庫。譬如大瀛波。直以片帆渡。所惜閻浮提。流
光如電住。倏已屆四旬。題詩感且悟。績學本人力。成名亦
天數。豈但屏筌蹄。終須忘魚兔。

趙忠毅公鐵如意歌和曾賓谷

曾公示我鐵如意。乃是前明忠毅趙公之所持。當時逆閹
盜大柄。欲隳地紀。傾天維。二三君子苦營救。交章那得登
彤墀。計窮乃變變。乃奇奇。功未可憑毛錐。奮袂一擊。雖不

中奸魂已逐如意飛偉哉如意鐵鑄之非刀非劍含鉞鑿
銘言可識不可讀竟體錯互蟠金絲百年鏽澀鐵花紫陰
寒吐餒無人知鐵骨瘦硬駭蛟螭鐵肝凜凜鬼魅啼謾言
過剛易摧折乾坤正氣良在斯君不見燕廷筑博浪椎丈
夫血性何淋漓豈惟不計身家安與危亦復不計青史名
常垂轉思如意有幸有不幸但問持者爲伊誰噫吁嘻處
仲叛賊首季倫暴富兒珊瑚擊碎成底事唾壺敲缺終何
爲

陸尙之愛日圖二首

惜陰本是儒家事愛日還徵孝子心安得綵繩牢繫住春
暉常映畫堂深

中丞手跡尙依然標置松筠小冊前
尙之爲陸青來中丞子卷首有中丞題句

好繼平原陳世德由來一日卽千年

鄭秋塘餽菊報謝

與君久作歲寒交晚節繁華更欲拋
白鴈已將霜到枕黃英纔見露含苞
栽花度曲君原樂君有願聞天下知音曲愛種人間得意花之句

沽酒談禪我自嘲旅舍張燈邀客賞
秋光淩亂映蓬茅

瞿花農瀟湘歸棹圖

瀟湘遊興罷一棹洞庭歸
夜宿明月滿曉行清露霏
平生惟好古此去更忘機
吳會多吟伴開樽花正飛

木芙蓉同佩香蘭城和胡香海二首

佳日過重陽
千林盡隕霜
如何臨淥水
窈窕邁明粧
帝女

芳洲珮天孫雲錦裳西風易憔悴誰與護微香
昨向隨園賞千枝復萬枝樓臺山翠裏陂沼晚晴時涼吹
來天末秋江動遠思霜葩無限好未免感衰遲

家弟少林至潤州訪余張舸齋左蘭城招集飲綠
山堂分韻

鵠原卅載此開懷況有詩壇舊侶偕庭綠經霜寒可飲窗
明向日淨疑揩半生離緒酌觥棹一夕遙情入舸齋怕見
蒲帆江上掛華筵散去便天涯

飲綠山堂畱少林分韻賦詩而舸齋與其配鮑蒞
香夫人走筆先成皆極工妙再賦一首兼懷雅堂
蒞香雅堂妹也鮑氏姊妹三人皆能詩

誰能夫婦擅詩名不負高軒此暫停
綵筆鮑家今姊妹烏衣王氏舊門庭
閨中擊鉢才如雪花下開樽髯有星
重話揚州春禊事只餘湖柳尚青青

賓谷來揚州一時名流倡和成帙擇其尤者鈔版以行題曰邗上題襟集茲復於衙齋西北隅築題襟館以實之爲賦二首

漢上題襟事騷壇喜再聞古今雖異地賢哲自爲羣
邗水秋風渡平山日暮雲長空飛鴈影聊復點斜曛
隙地分官署新營高館成梅心知愛客鸞友各求聲
石瘦靜尤碧窗虛寒更明公餘惟把卷合著短燈檠

儲玉琴畫溪春泛圖

澹安梁谿水溟濛罨畫山有人浮小艇盡日翠微間春雨
披蓑出斜陽罷釣還卽今雖久客夜夜夢西灣

爲周山茨前輩題老圃秋容圖

玉堂接武如前夕彈指顛毛各已白左掖紅梨夢裏春東
籬黃菊秋來色胸中萬卷足萬里十載窮荒飽冰檠歸來
揮卓摠奇懷健鷹衝破寥天碧劇思排案對伸紙交易所
書似蘇米客居咫尺見面難太息人書俱老矣

冬至後四日題襟館消寒小飲會者十四人以杜
詩刺繡五紋一聯分韻得弱字

才人擁旌麾不被簿書縛偶然逢令節自有文字樂題襟
詩久成題襟館新作倚石布長廊穿林出高閣階墀淨如

拭窗疏交似錯維時日短至一線陽回壑蓬蓬遠春意纏
勃在叢薄向明鋪几筵就暖行樽勺老蒼三數輩談鋒何
矍鑠英俊盡門墻詞源復騰躍先期折簡皆卽席分韻各
夜深月皎潔照入青油幕對之更開顏競進無算爵文陣
推君雄酒兵慚我弱意愜忘檢拘情真託諧謔昔賢官此
邦風流宛如昨永叔種楊柳魏公栽芍藥東坡尤超逸自
比仙控鶴不知彼一時賓從可今若竊恐後視今重霄摩

一鶚

劉雲房宗伯典試江南陳東浦方伯招至瞻園爲
庚辰同年之會宗伯有詩紀事方伯和韻見寄勉

答一章

白首重逢蕊榜人當筵如對古仙真月迎花底周郎酒雨
洗松間晉代塵猶記馬蹄遊上苑久疎魚翰報平津旌麾
更有三年住

時劉公新奉視學江蘇之命

詩老從今唱和頻

白下與雲房宗伯相晤歡讌累日因同遊攝山并
承過快雨堂別後郵詩六首見贈次韻奉答

當年走馬曲江頭轉眼風光不少畱垂老聯吟猶有分秦
淮同倚水邊樓

知君原是蕊珠人一卷叅同有夙因昨夜瞻闌涼雨過樽
前淨洗碧天塵

一盃脫粟一瓢羹秉燭高談興轉清會得元元元化意長
生原不外無生

猶記扁舟下洞庭鄭公鄉里舊曾經
蜺旌此日江南道又過仙壇五百齡

往代棲霞憶勝緣
陀居士對安禪
風林水鳥皆真諦
文字應須不用捐

杜老蓬門久不開
故人小隊暮方回
紅兒一曲差堪聽
花徑何時約再來

謝薌泉侍御自都中致書殷勤數百言情文兼至
且副以詩報答一章

中朝館望兼臺望
海內詩豪復酒豪
半載春風同跌宕
平生秋意獨蕭騷
書從鴻鴈來時發
月憶笙歌沸處高
風絮煙絲休細問
豈冠燈下恐重搔

用繼述之詩意

佩香圖詩和句曲女史自題元韻

伊人靜如蘭日夕與蘭對自是契蘭心匪惟寫蘭態生小
深閨中與世殊憎愛菱荷製爲衣明月裁爲珮獨向風前
立幽香襲羅帶吾聞古道者見人輒欲退蓬艾蔽其居中
和養其內君夙耽幽吟屈宋作儔輩近復喜無生微塵視
人代繪圖等空花真我應何在只愁下界人比作蘭香隊
歲歲花放時芳樽向君酌

奉和 禮王世子檀樽主人紅豆詞四首 有序

人居天際詩寄江皋鐵翅雪以成章圖飛花而作
骨銀河碧落託上界之相思梁苑秦簫作人閒之
佳話情何處起一往而深事到可傳千秋如見蓋

淮南騷賦之冠河間經籍之尊道則兩途心唯一
貫也治青龜耽咏白髮逃禪往日玉堂已如春夢
何時金管獲侍夜遊敬披黃絹之詞喜同見獵載
和紅箋之句愧比續貂

新蟾影弄玉鉤痕一寸柔情孰與論零亂胭脂吹滿地不
知誰葬美人魂

離離朱實整還斜半似明珠半似花近日紅星都墮地莫
教容易輾香車

燕尾翩翩雙剪刀裁成錦障倚雲高劉郎試到蓬山問開
過瑤池幾遍桃

芙蓉莊上發新枝

莊有紅豆樹

不是朱門二月時惆悵黃昏中

酒後小窗微雨一絲絲

茅畊亭學士獨立圖

憶余初見君君方作兒嬉衆中露頭角玉立神仙姿稍長
觀羣書卓犖不可羈賦才稱大戶文陣排雄師我時謂而
翁此子大必奇屈指幾何日致身白玉墀陳言入宣室說
經登講帷陰陰桃李枝豈獨盈海涯 胄子立問字教如
時雨滋君家本素封後堂羅竹絲記君髮垂肩偷將玉笛
吹至今精六律立草清平詞世事難預料屯亭遞遞移忽
然變貧窶朝食炊屨屨君真獨立者一飛冲虹霓迺來宦
雖達俸錢不療飢矧乃君本懷清慎愛自持守身似白蓮
純粹無瑕疵大儒貴不倚取意當在茲看君香案前鶴立

長紳垂鴻文及駿業卓然古與期

題雷雷峰山居垂釣圖三首

平生長劔倚雲高交盡東南湖海豪老去壯懷消不得祇
應垂釣向江皋

某山某水釣遊時頭白依然繫夢思多恐烟波深似海行
踪無復故人知

蜀江萬里碧吞天泛宅逍遙不計年應爲江南頻訪友林
陰常繫一行船

夢樓詩集卷二十四終

夢樓詩集序

余束髮受書後得讀先生詩以爲古之人先大夫詔余曰先生爲大父執友大父宰懷遠先生來遊時汝在襁褓曾見之並爲述先生文章學問里居科第甚詳景仰而私淑者已數十餘年矣歲戊申余來守皖郡適先生之孫光傑權郡屬叅軍言及先生之詩知詩板散佚檢家藏初印本重付手民且乞爲之序夫先生之詩如日月江河爲有目者所共覩後生小子何敢贅一詞第念先生往矣先生之詩膾炙人口久矣孰不願家置一編者今於原刻旣失之餘叅軍復鐫板以行諸世余以世交爲同官得觀厥成不可謂非幸也因謹識數語於卷後

道光二十九年歲次己酉四月後學張錫蕃敬跋

先大父翰墨流播海內凡海外朝鮮日本諸國莫不重價
購求至詩集刊以行世尤爲膾炙人口而刷印旣多字跡
日漸漶漫並有殘缺者光傑宦游來皖所遇士大夫索觀
者多篋笥所攜懼無以應而顧君兼塘李君佩留酷嗜風
雅請重梓之以廣其傳復身任校讐之役迨張鶴生先生
來守安慶並爲文序之以趣其成凡五閱月剞劂始竟不
揣固陋用誌數言因以見先澤之不敢忘亦以知友朋
之誼之不可誼也

道光二十有九年歲次己酉九月朔日孫男光傑敬識